



REPUBLIKA E SHQIPËRISË
Komisioneri për Mbrojtjen e të Dhënave Personale

Nr. 1034/1 prot

Tiranë më 30/5 /2014

REKOMANDIM

Nr. 54, Datë 30/5 2014

Komisioneri për Mbrojtjen e të Dhënave Personale, bazuar në nenin 29 të ligjit 9887 datë 10/03/2008 "Për Mbrojtjen e të Dhënave Personale" i ndryshuar, ka kryer mbikëqyrjen dhe monitorimin e faqes të subjektit tuaj në internet www.gazetatema.net/web/.

Subjekti juaj në cilësinë e kontrolluesit nëpërmjet faqes në internet www.gazetatema.net/web/, njofton personat që vizitojnë faqen mbi mundësinë e kontaktit (nëpërmjet rubrikës "Letër botuesit"), për të bërë publik problemet e ndryshme. Në këtë kuadër, duke marrë parasysh edhe veprimtarinë në fushën e medias së shkruar dhe elektronike, konstatojmë se kryeni përpunim të të dhënave personale për për kategoritë, "individë", "nëpunës" dhe "klientë".

Përdorimi i teknologjive të reja përmes përdorimit të internetit lejon mbledhjen e lehtë, të shpejtë dhe përpunimin e një numri të madh të të dhënave personale. Përdorimi i këtyre sistemeve apo teknologjive sjell përfitime për kontrolluesit dhe për subjektet e të dhënave personale, ato gjithashtu paraqesin një sfidë për mbrojtjen e vazhdueshme të të drejtave themelore të njeriut. Këto të drejta, në veçanti të drejtat për mbrojtjen e të dhënave personale, nuk duhet të minohen ose dobësohen thjesht sepse këto sisteme e kanë bërë më të lehtë ose më fitimprurës përpunimin e të dhënave.

Mbledhja, përpunimi dhe ruajtja e të dhënave personale duhet të kryhen sipas parimit të respektimit dhe garantimit të drejtave dhe lirive themelore të njeriut dhe në veçanti të drejtës së ruajtjes së jetës private. Mbrojtja e të dhënave personale është një e drejtë themelore dhe është e sanksionuar edhe në Traktatin e Lisbonës. Karta e të Drejtave Themelore të Bashkimit Evropian parashikon se: "Gjithkush ka të drejtën e mbrojtjes së të dhënave personale në lidhje me veten e tij apo të saj. Të dhëna të tilla duhet të jenë të përpunuara në mënyrë të drejtë për qëllimet e specifikuar dhe në bazë të pëlqimit të personit të interesuar, ose në bazë legjitime të përcaktuara me ligj. Gjithkush ka të drejtën e aksesit ndaj të dhënave të cilat janë mbledhur në lidhje me të, dhe të drejtën për të korrigjuar të dhënat".

Komisioneri konstaton se në faqen e internetit të kontrolluesit "**Gazeta Tema**" parashikohet mundësia e kontaktit (nëpërmjet rubrikës "Letër botuesit") me botuesin e Gazetës Tema, Z. Mero Baze, për të bërë publik problemet e ndryshme. Për realizimin e këtij qëllimi çdo person i interesuar, nëpërmjet faqes në internet, i drejtohet kontrolluesit duke plotësuar disa të dhëna personale si emri, mbiemri, adresa e e-mailit (për kthimin e përgjigjes) dhe titulli apo teksti i letrës që kërkohet të dërgohet.

Në këtë kuadër, duke marrë parasysh faktin e mbledhjes së të dhënave personale nëpërmjet faqes në internet (nëpërmjet rubrikës “Letër botuesit”) dhe llojin e veprimtarisë në kuadër të së cilës kontrolluesi mbledh dhe përpunon të dhëna personale, Komisioneri vlerëson se është e nevojshme që të realizohet informimi i subjekteve të të dhënave në përputhje me nenin 18 të Ligjit nr. 9887 datë 10/03/2008 “ Për Mbrojtjen e të Dhënave Personale”, i ndryshuar dhe parashikimi i masave të sigurisë në përputhje me nenin 27 të ligjit.

Faqja e internetit të kontrolluesit është “një dritare e hapur” ku çdo person mund të aksesojë shërbimet e ofruara nga kontrolluesi. Në këtë kuadër parashikimi i këtyre rregullave është i nevojshëm me qëllim realizimin e parimeve dhe qëllimit të vetë ligjit.

Komisioneri për Mbrojtjen e të Dhënave Personale konstaton se kontrolluesi “**Gazeta Tema**”, në faqen e tij në internet www.gazetatema.net/web/, nuk ka të publikuar rubrikën “*politikat e privatësisë*”, me qëllim informimin e personave që vizitojnë këtë faqe mbi mënyrat e mbledhjes, përpunimit, ruajtjes, si dhe masat e marra për sigurinë e të dhënave personale. Në këtë rubrikë duhet të publikohen të drejtat e subjekteve të të dhënave dhe detyrimet e kontrolluesit në kuadër të mbrojtjes së privatësisë. “*Politikat e privatësisë*” synojnë sensibilizimin e publikut mbi rëndësinë e mbrojtjes së privatësisë dhe të drejtat që gëzojnë në këtë fushë.

Mungesa e rubrikës “*politikat e privatësisë*” në faqen tuaj në internet www.gazetatema.net/web/ përbën shkelje të neneve 18 dhe 27 të ligjit nr. 9887 datë 10/03/2008, “Për Mbrojtjen e të Dhënave Personale”, i ndryshuar.

Autoriteti i Komisionerit vlerëson parimin e transparencës së çështjeve të ndryshme sidomos edhe në faqen tuaj të internetit si kontrollues, por thekson edhe rëndësinë e transparencës në përpunimin e informacionit të subjekteve të të dhënave në mënyrë që këta të fundit të kenë dijeni mbi: personat që njihen me të dhënat e tyre, qëllimin dhe mënyrën e përdorimit të të dhënave, kujt do t’i përhapen të dhënat, mbrojtjen e privatësisë, etj. Për këtë arsye çdo individ/subjekt i të dhënave personale ka të drejtën e mbrojtjes së duhur të të dhënave të tij personale. Përpunimi i të dhënave personale duhet të lejohet për aq sa është i nevojshëm, i drejtë, i ligjshëm dhe proporcional.

Për sa më sipër:

Në mbështetje të neneve 29, 30 dhe 32 të ligjit nr. 9887, datë 10.03.2008 “Për Mbrojtjen e të Dhënave Personale” i ndryshuar, si dhe nenet 107-109 të K. Pr. Administrative ;

REKOMANDOJ

1. Në zbatim të neneve 18, 27 të ligjit nr. 9887 datë 10/03/2008 “Për Mbrojtjen e të Dhënave Personale” i ndryshuar, në faqen tuaj në internet të publikohen në një rubrikë të veçantë “*politikat e privatësisë*”, me qëllim informimin e subjekteve të të dhënave personale mbi të drejtat që gëzojnë, si dhe të përfshihen kushtet, kriteret që reflektojnë parimet e përpunimit të ligjshëm dhe të drejtë të të dhënave personale. Disa nga këto parime do t’i gjeni në Opinionin “*Mbi Mbrojtjen e të Dhënave Personale në Faqen e Internetit të Kontrolluesve Publik dhe Privat*”, publikuar në faqen zyrtare të KMDP-së www.kmdp.al.

2. Në zbatim të Kapitullit VI “Personi i Kontaktit në subjektet përpunuese”, të Udhëzimit nr. 21, datë 24/09/2012 për “Përcaktimin e rregullave për ruajtjen e sigurisë së të dhënave personale të përpunuara nga subjektet përpunuese të mëdha”, të përcaktohet “Personi i Kontaktit”, i cili duhet të plotësojë kriteret e përcaktuara dhe të përmbushë detyrimet ligjore në bazë dhe zbatim të këtij akti. “Personi i Kontaktit” është përgjegjës për mbikëqyrjen e brendshme dhe përmbushjen e detyrimeve për mbrojtjen e të dhënave personale nga ana e Kontrolluesit “**Gazeta Tema**” dhe për bashkëpunimin e nevojshëm me Komisionerin.
3. Kryerja e këtij detyrimi të rëndësishëm të kryhet brenda një afati kohor prej 30 (tridhjetë) ditësh, nga momenti i marrjes dijeni të këtij rekomandimi.
4. Me plotësimin e këtij detyrimi të njoftohet me shkrim pranë Komisionerit për Mbrojtjen e të Dhënave Personale;
5. Në rast mospërmbushje të këtij Rekomandimi, Komisioneri vepron sipas nenit 30, pika 2, të ligjit “Për Mbrojtjen e të Dhënave Personale” i ndryshuar, sipas të cilit “Komisioneri në rast shkeljesh serioze të përsëritura ose të qëllimshme të ligjit nga një kontrollues ose përpunues, veçanërisht në rastet e përsëritura të moszbatimit të rekomandimeve të tij, vepron sipas nenit 39 të këtij ligji dhe e denoncon publikisht ose e raporton çështjen në Kuvend dhe në Këshillin e Ministrave”.

Duke ju falënderuar për mirëkuptimin,

FLORA ÇABEJ (POGAÇE)

